



Headline: Hafal skrip menipu
Publication/Portal: Harian Metro
Date: 21 February 2019

Language: Malay
Section: Setempat
Page: 29

Garret Dawum
garret@hmetro.com.my

Hafal skrip menipu

Kuching

Berlakon sebagai pegawai bank dan mahkamah serta perlu menghafal skrip. Itu kisah yang diceritakan mangsa penipuan pekerjaan membatikan 47 rakyat Malaysia di Kemboja.

Ketua Jabatan Siasatan Jenayah Komersial (JSJK) Sarawak, Superintendan Mustafa Kamal Gani Abdullah berkata, ketika memberi keterangan, mangsa mendakwa mereka turut diarahkan untuk membuat dan menjawab panggilan telefon sama seperti modus operandi digunakan sindiket Macau Scam.

"Malah, ada mangsa diarah mempromosikan judi dalam talian menerusi panggilan telefon dan mesej pesanan ringkas (SMS) kepada nombor telefon yang disediakan.

"Setakat ini, pihak kami menerima lapan laporan polis yang dibuat mangsa berhubung kes penipuan itu yang disiasat mengikut Seksyen 420 Kanun Keseksaan," katanya dalam satu kenyataan, kelmarin.

■ **Mangsa diarah buat panggilan telefon sama seperti modus operandi sindiket Macau Scam**



“Setakat ini lapan laporan polis dibuat mangsa berhubung kes penipuan itu”

Mustafa Kamal Gani

Menurut Mustafa, sehingga kini suspek warga tempatan yang disyaki terbabit sindiket penipuan pekerjaan itu dikenal pasti dan usaha mengesannya giat dijalankan.

"Hasil siasatan mendapati mangsa diperdaya kononnya untuk bekerja dalam bidang perhotelan di Kemboja dengan gaji bulanan antara AS\$1,200 (RM4,884.60) hingga AS\$1,500 (RM6,105.75).

"Mangsa juga dikehendaki membayar yuran pemprosesan AS\$200 (RM814.10)

hingga AS\$300 (RM1,221.15) ke akaun bank dan kepada seorang rakyat tempatan," katanya.

Beliau menambah, mangsa mengetahui tawaran kerja palsu itu menerusi Facebook dan WeChat.

"Mangsa diterbangkan ke Lapangan Terbang Antarabangsa Siem Reap, Kemboja secara berasingan iaitu pada Oktober dan November tahun lalu.

"Sebaik tiba, mangsa dibawa ke sebuah rumah dan

tidak dibenarkan keluar dengan makan minum disediakan, malah mereka dikehendaki menyerahkan telefon bimbit serta pasport kepada beberapa lelaki yang menjaga dan mengawal mereka," katanya.

Pada 11 Disember lalu, 47 warga Malaysia, termasuk 40 berasal dari Sarawak dan masing-masing tiga dari Sabah serta Selangor, selain seorang dari Kuala Lumpur ditahan pihak berkuasa di dua rumah berasingan di Poipet dalam Wilayah Banteay Mancheay, kira-kira 446 kilometer ke utara Phnom Penh.

PEMER